

四庫全書

集部

欽定四庫全書

方洲集卷九

明 張寧 撰

七言律詩下

歸良輔六十壽詩

曠曠初日照林扉  
靜露心香祝太微  
半世清風將白首  
一陽生氣到斑衣  
物情自昔明消長  
身世從今覺是非  
江使已通靈  
賦集壽星中  
朗鶴南飛

東坡雪竹

風捲殘雲暮雪晴  
天空野樹水烟橫  
淒迷望斷平安信  
衰薄如逢太瘦生  
月冷冰稍清入骨  
霜交疎影澹無情  
歲寒物色多相似  
到此方知晚節成

老君像

太史傳疑跡未磨  
猶龍人物更誰過  
流沙西去青牛遠  
函谷東來紫氣多  
文字五千流絕簡  
虛無八九藉餘波  
元玄臺下孤松老  
節錯根盤奈爾何

為許明夫題金碧山水圖二首

珠林瓊島錦江濱  
桃李東風滿眼春  
金碧樓臺何處盡  
丹青圖畫幾迴新  
中山古道多行徑  
北海寒波隔要津  
白髮題詩思何限  
少陵已是倦游人

佳氣籠蔥映海霞  
亂山環翠水生華  
笙歌不空漁樵地  
巖谷偏多佛老家  
金屋藏春簾結綺  
錦軒迎旭扇籠紗  
太平人物歡遊盛  
回首芳春日易斜

送薛公子

嬌歌急管送春輝  
春色薰人上錦衣  
花壓玉山人盡醉  
雲隨金勒馬如飛  
鱸魚江上詩情遠  
燕子樓中客夢微  
此去不須成悵望  
桑弧蓬矢願無違

壽曹繡衣廷章父

海屋添籌豸擁冠  
壽星光映紫微寒  
早來同甲誰相似  
老去承恩古亦難  
春向百花莊上滿  
人從五老畫中看  
列卿御史中書宅  
莫道非熊夢已闌

迎碧堂

茆屋臨深面面開  
虛明無處著塵埃  
蒼茫晚色烟中起  
晃漾晴光雨後來  
靜綠侵衣人傍檻  
空青入座水生苔  
詩成卻愛沿流咏  
蘋蓼香中有釣臺

壽劉侍御母八十

朝廷有道家無事  
八十年來見太平  
婚嫁及時諸子在  
閨門如水一身清  
龍章到日心應滿  
鶴髮逢秋眼倍明  
如記北堂萱草畔  
年年此日慶長生

相文吉裕陵進香還任

千里遙持一瓣香，鈞天無路覲先皇。  
翠華想像宸儀遠，玉几彌留末命揚。  
終古山川歸永宅，九霄日月麗重光。  
東風不盡昭陵淚，回首空江烟水長。

賀崔千戶中試

廣場初日照戈矛，一騎紅塵忽過溝。  
弓影橫開弧月滿，劍光飛決白雲浮。  
勲名不廢先公業，談笑能分主將憂。  
好趁少年能事日，玉闕千里覓封侯。

嚴侍御提學南直隸賦得驄馬行春卷送之

使君驄馬出康莊千里江淮淑氣長  
南國盡興周禮樂  
西京不改漢文章  
衣冠總被陽春澤  
草木猶沾化雨香  
不獨澄清眼前事  
百年桃李在門牆

送夏大尹復任江西

昔年曾共杏園遊  
物候驚新野水流  
霄漢六年長在客  
雲山千里又逢秋  
微霜夜度吳門樹  
疎雨涼生楚客舟  
作邑如君應有待  
不須樽酒慰離愁

題菊隣卷



風露蕭條一草堂  
四隣惟有菊花黃  
清連魏圃秋容澹  
疎映陶籬舊宅荒  
穿徑香無鵝鴨惱  
過墻猶訝蝶蜂忙  
只應晚節長親並  
不減當時碎錦坊

寄吳東升

棘門歌管振芳辰  
翰墨窮工世絕倫  
缺氣猶寒彈後月  
筆花空晚夢中春  
盛時郎將烏紗舊  
幕府儒賓白髮新  
二十知名今共老  
相逢不是薄遊人

辰州高指揮竹軒

百戰功垂萬戶侯，綠雲高隱草堂幽。  
平安不是青門日，蕭瑟猶驚紫塞秋。  
一枕寒聲疎雨歇，滿庭涼影夕陽收。  
門牆遠帶湘江意，何日相尋樂醉遊。

遊朱協律山房

欲尋勾漏問丹砂，因過玄都羽士家。  
壺裏有天遲日月，洞中無路入煙霞。  
書餘別院聞清磬，坐久空林見落花。  
安得閒身如野鶴，共臨秋水誦南華。

再遊朱氏山房用前韻

九轉新成玉鼎砂，洞門深鎖是誰家。  
鶴書一寄連滄海，鳳管雙吹隔紫霞。  
舊雨重來前度客，東風又發去年花。  
何當了却平生事，餘向山間老歲華。

題菊坡秋芳圖

歲序年芳似水流，棲遲風景老丹丘。  
斜陽疎影和人瘦，夕露寒香伴鶴愁。  
開口笑逢今日醉，滿頭狂憶少年遊。  
柴桑舊隱知誰在，爛漫殘花獨自秋。

湖山歸隱詩為周佑推官作

東湖山水繞柴桑舊隱歸來業未荒  
蘭澤秋風羣鴈下  
草堂春雨百花香  
林泉久屈周顛節  
詩酒今同賀監狂  
人事已周身事遂  
白頭清世趣何長

壽陽武侯祖母鄴國夫人

白髮朱顏邁八旬  
五朝門第太夫人  
侯封慶衍曾孫蚤  
伯爵人誇宅相真  
鄴國儀章金作鳳  
主家供具玉為麟  
洞門潭府梅花月  
千古同含不老春

張侍御汾溪六景

汾溪雨霽

東風吹雨過山溪  
霽景無窮入品題  
花落平林春水漫  
草深高岸夕陽低  
天光蕩漾羣鷗下  
雲影蒼茫野棹迷  
幾度臨流坐忘返  
夜深隨月轉荒谿

馬步夕陽

路轉荒村隔斷灣  
古橋斜日映青山  
蒼茫影裏長虹卧  
欵段聲中駟馬還  
枯木殘鴉行客盡  
野烟寒水釣舟閒  
濟川功業知相待  
莫道侵尋暮景間

鳳山秋晚

鳳山十里鬱崔嵬曙色初升霽色開萬壑晴雲連碧落  
滿林涼露濕蒼苔霏微灝氣催寒蚤掩靄晨光入戶來  
幾度東籬閒眺久悠然相對菊花杯

松磴鶴鳴

千尺喬松古磴隈綠陰滿地鶴飛來清音雅合琴中調  
傳信應從海上迴孤館晝眠詩夢醒九臯人靜客懷開  
勸君莫作遼東語好叶韶鈞入鳳臺

南館書聲

溪南書館隔幽林，燈火通宵歲月深。  
斷續曉隨鷄唱歌，咿唔寒共漏聲沈。  
飯牛辭古懷高節，彈鋏歌長見苦心。  
今日青雲軒冕貴，還應不負買書金。

東江漁火

落日漁舟趁晚潮，夜深漁火亂相交。  
江空野水和烟汲，月黑黃蘆帶雨燒。  
風急柳梢光欲滅，浪平沙際影還搖。  
惟應南館書牕下，夜夜青燈伴寂寥。

顧文之進士養病還姑蘇

飄飄詞氣欲凌霄翠竹蒼梧玉樹標酒病漸疎潘岳鬢  
詩懷新減沈郎腰杏花春雨江南夢淡月疎星薊北朝  
身在故鄉心戀闕未應蹤跡混漁樵

寄范處恒

蒼茫無路入林扃草色緣階竹繞庭滿地烟霞朝採藥  
一天星斗夜吹笙興來自擬騎鯨客醉後多臨相鶴經  
何事白雲閒出岫遠攜官綬下明庭



舟中與徐文海敘舊追賦舊事三首詞雖婉媚意

實經常總不能效麗則之言然亦非香奩體也  
龍髻盤雲翠作翹繡鞋尖小束輕綃鱗鴻附托芳心許  
弟妹傳呼小字嬌彩鳳竟分蕭史伴黃花瘦減易安腰  
無端却憶朱簾下手劈雲香待月燒

曾將玉杵搗玄霜紅葉無情逝水長明鏡已孤鸞鳳影  
羅衣空染蕙蘭香東風夢覺空凝涕秋月詩成欲斷腸  
唯有謝家兄弟在時時相見一淒涼

能書能賦復能棋學得功成欲向誰阿大  
中郎真有意  
參軍新婦竟難為莫思舊事成新事相見  
閒時即悶時  
聞道赤繩先繫足可能重和白茅詩

追輓鄭良載

君門蚤乞此身還白首心期石壁山喜有  
文章歸大雅  
恨無金紫列青班行雲逝水應何在塵世  
浮生總是閒  
却愛謝庭蘭玉茂依然清譽滿人間

江山勝覽為維揚張明之題

萬里江山接故鄉十年詩酒任踈狂  
黃河西去龍門遠清渭東來劍閣長  
一騎寒雲登五嶺孤舟明月度三湘  
何當收拾天涯興歸卧維揚舊草堂

八月十九日與張良甫宿彭城風雨有作

夕陽初挽上洪舟邂逅彭城此夕秋  
世事關心多感慨故人相見易淹留  
對牀風雨疑前夢舉目江河念昔遊  
幽話更長秋夜短不禁鐘鼓起譙樓

張道士雪崖

冬來積雪滿塵崖清賞都歸物外家絕磴高寒春尚早  
古壇虛白夜無譁望中乍失青城路深處應開玉樹花  
留得歲寒終古意年年幽寂卧烟霞

登子陵祠

南遊重上富春山高節清風竟莫攀苗裔尚存寒士業  
松堂長伴客星閒千山秀落雙崖裏一水名高四海間  
日暮長歌山下去隔江猶有釣船還

夜行舟中聞笛

白露青楓夜色寒  
何人吹笛向江干  
風迴浦漱灘聲合  
月落關山客夢殘  
金殿幾時聞舊吹  
畫樓何處倚危欄  
天涯早已難為聽  
況復懷人淚不乾

除夕風雨卧病郡齋

蕭蕭風雨到閒庭  
愁病相兼酒易醒  
身外功名何潦倒  
眼前兒女尚伶仃  
清霜客鬢隨年白  
芳草雲山入夢青  
底事夜深眠不得  
自燒銀燭看醫經

過皇恐灘

曾於信史見遺名今日番從此路行極目煙霞迷石浪  
滿船風雨起灘聲分明瞿峽西遊處彷彿梁山北去程  
獨有孤臣懷國意東流不盡故時情

壽沈廷貴母夫人張氏

封章頻沐聖恩覃眼底年華七十三八座功名勞主饋  
九重侍從見宜男花迎淑氣春方好蔗近秋風晚正甘  
想到高堂稱慶日錦衣華髮共清酣

送王元昭赴中都

淮西留守去何之千里春江草綠時  
聖主有懷湯沐地官曹不忘大風詞  
投壺別野清遊慣運甕空齋獨卧遲  
君是玉門班定遠可能高枕廢驅馳

送薛九南遊

舊家公子擅風流十載江湖賦遠遊  
一飲不辭鴆鵠舞千金新買鷓鴣裘  
神遊湘水雲生浦夢覺閨門月滿樓  
猶有故家遺烈在幾回含笑看吳鉤

過伍公矩宅

湖頭秋水映樓臺湖上荷花幾度開西塞風烟遊子返  
北山猿鶴故人來閒談舊事心先醉坐惜流光晚又催  
清興滿懷消未得欲呼漁父共餘杯

病還部議未許將北行

雙鬢蒼浪野興生靜依疎柳聽秋聲一身未老心先老  
萬事無成病早成門巷蕭條歸似客江湖飄泊住還驚  
如何歲晚青山下猶有天涯未了情

詠草為劉公覲



幾度陰陰幾度晴年華不改舊林垞風霜滿野根都白  
天地無心葉又青濃伴客愁迷遠道澹隨詩思到閒亭  
蘼蕪萬里湖南路一片蕭疎繞洞庭

班婕妤團扇圖

寵辱由來事不常佳期未必永相忘君恩偶為炎涼換  
妾意終當篋笥藏粉黛香消金屋妬熊羆夢反玉簪祥  
舊懷寥落新愁併長信宮前草又黃

月波亭

明月流光水上頭，凭欄對月思悠悠。  
江湖萬里何人共，天地百年今夜秋。  
桂子香生翻兔藥，蘆花影動泊漁舟。  
此情欲借清商發，抱得瑤琴不自由。

丙戌除夕舟次富陽

三百九旬今夜盡，四十二年明日來。  
功名荏苒老將至，紅塵汨沒朱顏催。  
庭幃咫尺如萬里，飛夢復繞黃金臺。  
明年今夜知何處，卧聽寒潮心轉哀。

和陳彥章見寄用錢學士原韻二首

蚤期功業誓河山未到封侯惜暫閒飛將霸陵逢醉尉  
孟嘗函谷滯晨關和烟芳草凝愁發帶雨寒潮載夢還  
身在江湖心魏闕幾回寒暑念民艱

草堂尊酒對南山身外功名似夢閒老我病辭青瑣闥  
看人生出玉門關垂楊野渡虛舟泊古木荒林倦鳥還  
離合悲歡總回首可應頭白尚多艱

戊子除夕

前年此夕泊錢塘去歲寒燈卧草堂客路風霜閒亦擾

故鄉詩酒病還狂  
送窮漫學車船戲  
逐疫新翻傀儡裝  
最喜家門盡強健  
綵衣稱慶醉椒觴

雪中偶書

江南三白兆豐年  
最好湖山晚霽天  
沽酒欲迷歸市路  
捕魚還見出浜船  
雲連野色和烟暝  
人共梅花待月圓  
不是梁園詞賦日  
也隨清景一陶然

許廷冕留詠亭

曲水流觴事不迷  
山亭渾似浣花溪  
情閒野渡舟橫晚

思入空梁燕落泥誰向松間尋舊作自從竹下刻新題  
山靈不管詩人倦草綠烟明鳥亂啼

採芳艇

十里湖山一葉舟年芳荏苒水東流聞歌白苧聊相和  
欲採青蘋不自由杜若洲空逢斷荇菰蒲渚淺趁輕鷗  
涉江風雨芙蓉老遠道深秋已倦遊

再遊寶所

負郭岩扉敞石壇上方門徑繞層巒樓觀海日夜先曙

竹引湖風夏亦寒  
林外歌聲泉出谷  
水中人影釣揚竿  
何當雪月烟花候  
來共山僧信宿看

范德章金臺對雨詩卷

南北追攜共一身  
對牀風雨夜紛紛  
醉疑瞿峽愁中卧  
寒憶巴山夢裏聞  
白髮孤燈人望遠  
綠波芳草鴈離羣  
何年得似彭城會  
剪燭論詩坐夜分

雪村書舍

積雪空林晚乍晴  
小牕孤榻罷韓檠  
光搖竹簡芸牕淨

寒入梅花紙帳清坐久卻疑更漏斷夜深兼借月華明  
洛陽舊隱如相問為報袁安素業成

送劉繡衣兄還江西

黃金臺下駐春暉千里江山足馬歸淮浦東風芳杜合  
楚江烟雨鵲鴛飛重來會見聲華著此去無令信息稀  
獨有惠連傷遠別天涯回首各沾衣

為豐叅議題柳岸春風

林塘三月柳依依搖颺東風近竹扉旋逐歌聲飄舞席

淡隨春氣入羅衣  
落花滿路啼鶯歇  
芳草凝寒燕子飛  
自是平泉行樂處  
風光不與賞心違

送徐用濟太守還金谿

飛蓋雲隨畫舫還  
不須童穉候柴關  
南州舊隱文章顯  
中世高風富貴閒  
松竹未交秋節後  
桑榆猶在午陰間  
年芳正好故人去  
一曲清湖繞碧山

和王瑞之旅懷見寄

萬卷圖書一葦航  
不因流落滯遊方  
行遲祇為山留坐



閒絕惟應酒送忙  
旅館風煙多勝日  
故園桑梓未斜陽  
秋來亦有歸飛燕  
王謝堂高是異鄉

山水圖

水車聲急綠陰肥  
水漫魚罾白鳥飛  
斜日照林停晚妝  
新蒲近渚映春衣  
采蓮歌唱時將及  
競渡風光事已非  
望斷五湖舟去遠  
月明應有市船歸

為吳方伯寫海天秋望圖

老樹荒山海上頭  
碧天沈水不勝秋  
乾坤定位東南缺

江漢朝宗日夜流  
人世勞生真渺粟  
仙家何處是浮丘  
凌虛不見揚塵處  
風送雲濤起蜃樓

畫秦山書屋圖

茆屋幽深草樹中  
早來心迹暮還同  
錐毛有鐵詞峯隱  
燈壁無隣眼照空  
桂殿秋香天外月  
龍門春漲海邊風  
惟應詩畫消長日  
慙負賡歌作繪功

雲山訪隱圖

獨向青城訪隱君  
岩扉深香路氤氳  
山翁採藥不知處

童子迎人猶閉門斜照入林松影亂迴風出澗水聲分  
晚來再問經行地指點春峯頂上雲

雪牕夜讀圖為沃饒文裕

萬樹陰沈雪乍晴兩峯寒寂澗流聲玉京有路春何處  
銀海無波幾變更明月到牕松火盡斜風穿榻苧幃輕  
殘編未了清無寐不為梁園賦不成

送于憲使致仕

亂山孤騎大江船跋涉艱危二十年一代鳳麟天下士

四方霖雨夢中賢黃金臺古安車遠綠野堂空畫錦旋  
留得清忠表臺諫娟娟秋月照霜天

竹溪書屋

竹林書舍語溪頭萬玉叢深一水流涼氣入簾相帙潤  
綠陰當戶石牀幽偶乘淇澳詩人興又起沅湘旅夜愁  
雅頌不忘清節在春風行見鳳來遊

墨梅

淡烟寒水野橋邊風景依依似臘前遠道荒涼遲驛使

空山搖落見流年，凭闌東閣春當座。  
載酒西湖月滿船。  
羌笛何須怨三弄，青青如豆更堪憐。

為牛文振題墨梅飛白竹二首

林谷無媒草蔓纏，歲寒心事只依然。  
長因遠道逢人寄，憶得空山獨夜眠。  
隨處月明容野夢，幾分春色上吟肩。  
別來風雨頻搖落，猶自幽閒是往年。

風度長疑帶雪看，憑誰留興入輕紈。  
素鸞有影當牕見，清籟無聲特地寒。  
霜落渭川秋慘淡，月明湘水夜迷漫。

平生雅操今猶在  
顏色蕭疎節未殘

席間答景瞻景章諸同遊

二十五老不常好  
三百六旬如擲梭  
鏡中白髮已如此  
湖上青山將奈何  
清會有詩兼有酒  
佳人能舞復能歌  
從來得喪都如夢  
何必驚誇春夢婆

題乾坤一草亭

杜陵野老身如寄  
家住千山獨掩扉  
萬事浮沈遺構在  
百年離合舊鄰非  
亂山風雨催吟盡  
永夜星河照影微

不獨南陽卧龍事子雲詞賦未應稀

題魏尚書和周彥充詩

客牕孤榻坐新涼展卷超然古意長韓魏從來重師魯  
蘇公早已識元章百年人物歸吳越千古文章邁漢唐  
見說東園老無恙西風寒並菊花香

乙卯三月再遊勝果寺書事

清霜落葉寺門前十載重來問老禪勝事幾迴芳草歇  
舊遊無復盛時全江分吳越橫通海山近蓬萊直上天

便欲移尊窮絕頂不堪風雨惜殘年

李漢祥退閒詩

男婚女嫁已闌珊  
斷送浮生作大閒  
不是逢僧聊半日  
直須投老入孤山  
潮平野渡虛舟泊  
日昃寒林倦鳥還  
車馬自喧心自逸  
滿庭芳草華門關

沈士容母壽詩

南山高拱北堂幽  
五色衣裳映白頭  
勿藥病消元有喜  
如岡壽永合忘憂  
蟠桃秀結三千歲  
樛木陰深八十秋



滿目曾玄太平世百年家慶荷餘休

黎滄洲邀飲靈隱小酌永福僧舍

靈鷲山高石竇空冷泉亭外樹龍葱人行絕澗春無雨  
花落深林夜有風山水增妍詞客在衣冠尋樂故人同  
舞雩沂水歌遊歇盡說蘭亭翰墨工

三月晦日遊龍井

倦扶殘醉過湖隄物候催新客思迷桑柘林疎蠶事促  
菰蒲水淺鷺行低泉聲落澗龍淵近山勢凌空鳥道齊

苦欲相留留不得晚風斜日杜鵑啼

送温州揮使陳汝玉朴菴之孫

四世簪纓見祖孫六朝鈇鉞衛將軍清英不忝千金子  
雅厚元從萬石君劔蓄靈光徹牛斗兵凝朝氣待風雲  
送君不盡懷人恨目斷江東舊鴈羣

再遊靈隱寺

三月春深日日晴桃花未落柳陰清素羅衣薄松風淡  
斑竹兜輕石路平盛世多才慚獨往客遊無處寫閒情

倦來更欲緣溪步為借寒流一濯纓

四月九日陰僉憲邀遊西湖

海道行春興未孤南風迎節下西湖天分瀛嶼三山地  
人在瀟湘八景圖巢閣詩翁今在否龍門遊客到曾無  
相逢已盡登臨樂酒罄芳樽莫再沾

醉中用前韻寄所知

漫道西園旅況孤一春光景四遊湖笑辭粉綠陪歌管  
戲索丹青寫畫圖縱筆題詩千首易倒囊酬客半錢無

白頭取醉應非昔不用隣船借宿酌

為陰僉憲題畫

千古江山舊物華可人風景自清佳浮塵不到漁樵地  
勝境元無佛老家石徑逢秋多杞菊水亭留客盛茶瓜  
晚來風急鷗羣散一片澄波映落霞

松鶴圖

松老巢空日半曛碧山高絕鶴成羣三分浮雪凝珠樹  
一片飛瓊隔彩雲陰磴長鳴雙子和晴臯孤唳九天聞

平生毛羽皆清白不帶蓬栖野雉紋

春意圖為隱僉憲題

鈞陽幾日動灰葭轉眼韶光徧海涯發育共憐春有腳  
殘傷誰謂鼠無牙蘭萱地近森將老杞橘林陰宿未華  
一種東風生意別月光應照不毛家

滄洲清趣卷

竹籬茅屋住滄洲風景宜人歲序幽水漫魚梁穿筍下  
雨漂鳧藻近牕流歌聲夜落秦淮月詩景涼通楚澤秋

清濁浮沈總如許晚將心事托虛舟

聽雨為朱元素題

殘燈照影倚躊躇  
瀟颯聲中淚點俱  
衾枕夜寒身獨在  
池塘春草夢全無  
風淒敗葉悲荆瘁  
水漲平沙怯鴈孤  
忽憶彭城對牀事  
不勝清苦一長吁

姑蘇伊僉憲父壽詩

元朝元夕喜相催  
吳水吳山淑氣回  
人過良時躋耄耄  
境當佳處擬蓬萊  
五湖鷗鷺恩波濶  
一代衣冠壽域開

最好兒孫忠孝在棄官終養蚤歸來

稼軒

富貴功名淡欲忘幽居無恙樂時康  
幽風世遠茅絢在莘野人非畎畝長  
白鳥近畦苗合秀黃雲映戶稻生香  
不知桃李園中景何似柴桑舊草堂

送伍舉人舜廣

顛顛文采下蟾宮步歷青雲路幾重  
秋草香聞周野鹿春雷聲促禹門龍  
連城白壁新辭璞百鍊黃金正在鎔

此去蓬山知不遠看花應上最高峯

和于景瞻王瑞之歲暮述懷無詠梅竹二作因以  
見彼此之情

天時人事漸闌殘蓬戶蕭疎海邑寒世路亡羊先自息  
清琴別鶴更誰彈青山有地堪投老白髮無人可遣安  
歲晚西湖歌舞歇暫應容把釣魚竿

莫看南枝與北枝每因詞賦見心期為憐宋老風雲氣  
不減逋翁水月姿已發榮華隨處賞未開情思幾人知



一簾淡月清宵永誰似牕前忽到時

題徐元玉蓮塘勝賞詞後

十里紅芳載酒行興來誰復顧陰晴無端此會聊相偶  
有約重來恐未成擊楫聲孤人語歇濟川名重客舟輕  
風光想像湖湘路欲借遺文弔賈生

贈張相士

閱遍寰區二百州江湖無處不追留疑從單父城邊見  
曾逐麻衣道士遊黃髮年中知老大白衣叢裡識公侯

相逢為問來秋事笑指青雲一點頭

張僉憲湖山行樂圖

江湖情思廟堂身行盡吳山兩度春  
范老不先天下樂蘇公豈是宦遊人  
菊松有待歸應晚琴鶴相忘貴亦貧  
他日懸車定何處午橋莊上杏花新

輓孫孟璵醫士

生芻束玉見無因宿草荒烟悵望頻  
轉眼忽驚千古別到頭誰是百年人  
海邊明月傷心夜湖上青山揜淚春

惟有匡廬杏花樹東風依舊歲華新

吳汝秀求先人詩集序有作

湖橋春水泊輕舸冒雨相過重爾勞喜見伯溫編擊壤  
慚非元晦敘離騷繫駒此夕閒空谷鳴鶴何時徹九臯  
芳草王孫又歸去客邊聊為一揮毫

再送歐員外

越水吳山近寂寥秋來到處動歌謠司徒鄉土簪纓表  
科甲文章錦繡標千里星霜勞使節九重雨露下宸霄

元功自有玄圭錫好副民風十二條

陳大尹秦淮書屋

短牆幽徑草纖纖流水浮光四遠簷  
藜杖近分天祿火芸編新絳鄴侯籤  
魚龍變化書連屋奎壁森羅月滿簾  
一東囊攜人去後舊幃穿榻閉清嚴

聞鄭子高參政訃

一自同舟下第歸重聯書劔上春闈  
青雲得路故人散白首還家往事非  
漫有東芻懷遠道空鷲宿草閉玄扉

傷心不似當年別目極南天淚滿衣

甲寅二月晦日雨霽會飲朱彥明莊上

林梢曙色映朝霞沙淨春堤步落花負郭有田清世業  
高居無事野人家簷空剩插清明柳山近先烹穀雨茶  
不是青春壯遊處暫隨歌舞樂年華

竹鶴軒為馬浩瀾題

琅玕娟淨羽衣鮮彷彿湘君駕月旋見實何年隨鳳下  
報安常日有書傳烟梢滴露秋先警雨篠驚風夜不眠

桃李無情鶯燕別，憑留聲節上芸編。

松石行窩

靜老山林故有期，行軒移鑿是何時。  
陰連絕壁雲孤峭，枝壓浮峯雨半欹。  
十載風霜寒士節，萬間梁礎大方姿。  
陶潛已去元章遠，歲晏齋空只自怡。

吳栖雲輓詩

人去滄洲歲幾何，青山芳塚鬱松蘿。  
生榮未盡安車召，死別猶驚鼓缶歌。  
東道高懷賓客在，南州舊族子孫多。

雲栖不逐秋風散，閒待遼陽化鶴過。

送吳汝貴謫官入閩

舊家人物盛時賢，粉署知名又十年。  
六月鵬程應一息，千金龍劍暫孤懸。  
江城歇馬春將盡，山館聞鷄夜不眠。  
倏忽相逢便相別，宦情鄉思各依然。

蘭谷

石屋幽深小徑斜，繁芳刪盡地清華。  
壇荒尚譜宣尼操，畹廢猶存屈子家。  
霜淨獨餘凋後葉，泉香時泛落來花。

南州高士元蕭散入室無人亦自嘉

題古畫

山淨浮雲水淨烟清寧風景是何年沿村古道無戎馬  
近渚幽亭有釣船慘淡畫圖人已遠淒涼題詠世猶傳  
小牕風雨無人夜彷彿清損到耳邊

于景瞻宅賞牡丹花時已過感而有作呈諸公屬

和

惜花無奈看花遲孤負春風第一枝急景最憐將落候



芳心還憶未開時  
賞因多病難勝酒  
吟到無題別是詩  
分付東君好培護  
與花先定隔年期

何處相攜宴牡丹  
年年三月在長安  
也知白首聯詩坐  
不似青春把酒看  
羅幃無風香氣暖  
金盤有露玉容寒  
故情不逐韶華改  
徧倚斜陽十二闌

錢舜舉雲山秋景圖

百里溪山一色秋  
嶺雲汀樹共悠悠  
何人欲著閒居賦  
有客將歸遠道遊  
林外漁樵黃葉渡  
水中亭館白蘋洲

風光滿目知何處不是吳州是越州

甲寅三月登吳山悵然有作

遊適時頻趣轉濃少年吟眺已成翁從教白髮三千丈  
不盡青山百二重海接江湖通郭水市連丘壑礙樓峯  
登能作賦人誰是俯送浮雲散碧空

為陰僉憲題馬湖府土官知府安鰲族譜

瓜瓞綿綿世澤饒遠從西漢到天朝山湖帶礪藩垣久  
江漢朝宗海嶽遙華胄直須家譜悉累功還見史書標

于今四表重光被九族都應仰聖堯

毛處士八十壽詩

壽星光彩燭南天白髮逢春八十年  
世際七朝人物泰家傳四世子孫賢  
西湖杖屨開行館北海尊罍列慶筵  
記取十年須一會還應兩度醉花前

赤壁圖為嚴仁遠揮使題

新秋時節又新冬兩度登臨謫官中  
歌歇洞簫清對客夢回孤鶴醉推篷  
百年詩賦遺文在三國江山舊業空

聚散升沈一樽酒盡隨殘雪踏飛鴻

畫秋山圖有題

荒烟野樹滿重丘人在青山最上頭  
直北關河燕月暮向南鴻鴈楚雲秋  
閒登古寺尋僧話獨立危巖看水流  
蓴菜時香鱸正美西風不見季鷹舟

黎今俊滄洲卷

悠悠書劍易蹉跎一卧滄洲歲月多  
斷卷秋風迴駟馬小亭春水浴羣鷺  
醉醒無復江潭問清濁何勞孺子歌

見說雲溪有圖畫故人詩酒意如何

追挽何都憲祖考妣

一生丹穴一岐陽瑞鳳祥凰兩頤頤嶰谷何年諧律呂  
高岡初日煥文章天留落羽羣雛出人說來儀百鳥翔  
不是遼東華表鶴雙歸應復五雲鄉

何都憲望泮樓

重慶堂西百尺樓登臨如在泮宮遊一方禮樂觀瞻便  
數仞門牆眺覽周文廟地高道月殿泮池水滿入瀛洲

青衿故是君家物日日凭欄望未休

何都憲重慶堂

階下芝蘭滿屋香庭前橋梓再重行  
薇名早著登科錄盛事宜標世宅堂  
教誥定聯雲錦軸兒孫齊著綵衣裳  
只應萬石君家似世德相傳福履長

闕里孔遠文占籍杭州年七十以夏大理賀詩求  
和為賦一律

落落猶存爾雅風年高七十未成翁  
家傳東魯衣冠後

人在西湖水月中玉立清秋千歲鶴雲停霽晚兩高峯  
不知海屋籌添未昨夜安期有信通

四月十三日遊靈隱二首

清和時節最宜人忘卻東風已過春猶有落花隨水盡  
漸看幽竹出牆新十年壺榼嗟為客五畝園居待卜隣  
遊賞事同情趣別前湖歌舞正通津

靈鷲峯邊合澗東風光不與昔遊同春蠶作繭柔桑盡  
社燕移巢舊巷空風蕩泉聲猶振激雨陰山色久溟濛

結茆便欲巖栖老時物驚心歸興濃

武克顯博古堂詩

淨几明牕翰墨香故家文物滿芸房  
畫圖不混古今筆簡冊常分品第裝  
老我每因清事到為誰重整法書忙  
從來鑒賞非時好絕勝王家寶繪堂

江村一曲

一曲清江碧四圍江村日日淨涵輝  
烟深柳色迷花塢風急蘋香滿竹扉  
巢燕飛閒應識主汀鷗眠熟慣忘機



不知杜甫題詩處景物于今似此非

沈元節父母輓詩

耆舊凋傷不忍聞，愁將薤露作招魂。  
百年故物青氈在，半世推恩紫誥存。  
高塚松梧秋冷淡，舊堂花竹月黃昏。  
欲知死後生前事，滿眼芝蘭盛子孫。

金藏玉蘊美相宜，景及桃夭是盛時。  
箕帚分甘姑舅喜，閨門慶協聖明知。  
重闌日永春何麗，樛木陰深晚更滋。  
今日北堂寒雨夜，有人長慟蓼莪詩。

甲寅中秋會飲張用文宅待月

何處銜杯看月圓  
兩峯庭院石闌邊  
山河倒影冰輪滿  
星斗藏輝玉燭懸  
白髮丹心秋幾度  
藍橋青瑣夜何年  
醉來索共嫦娥語  
誰似風流李謫仙

畫雪松送柳太守北上

景物淒迷野色荒  
空山歲晚見孤芳  
凌高氣勁緣蘿斷  
覆下陰深弱篠長  
根到幽玄枝亦古  
心含和煦葉都香  
巖寒歷盡陽春布  
天為王家老棟梁

送汝舉人赴禮闈二首

聖主重華世泰和  
四門清闕啓賢科  
雲垂龍虎開天榜  
風動麟鳳廓禮羅  
小雅笙歌周宴古  
大方文字漢京多  
吳江自與天池接  
快見鯤騰際海波

賓鴻時漸鹿和鳴  
天路無塵野有萍  
運啟六飛升帝極  
文同五緯聚奎星  
珣弓中鵠猶彎矢  
寶劍搏犀乍發硎  
見說禹門春未化  
年來三月少鷺靈

題俞章懷椿卷

腸斷高林淚迸泉蕭蕭風葉夕陽天春秋望絕八千歲  
日夕愁過百萬年有約松筠空自好無情橋梓為誰妍  
燕山路杳人何在丹桂寒香益惘然

白都閫攜牲酒相訪夜酌有作

小山斜日晚生陰紅燭青尊坐夜深制閫多才起武舉  
匡時有策起儒林明良自感非常遇老病空談未邁心  
不是春宵花月宴也應一刻直千金

平湖吳伯諧大尹見過別後有寄

駐馬瓊林醉綺筵  
手分霖雨下南天  
軒墀虎衛仍相待  
枳棘鸞栖只暫遷  
自昔兵民同化美  
于今文武見才全  
欲知茂宰清平治  
胥吏無能歲有年

賀人納粟冠帶

自獻贏金報治平  
不因干祿為時名  
邑分十室有忠信  
義出千人是俊英  
宅里旌添華屋潤  
冠裳榮稱素衣清  
東南多少輕肥者  
滿執牙籌過一生

正月十三日雪

騰六迴車路未遙又隨青女候元宵未應柳絮因風起  
剩見葭灰過律飄陰壑冰漸鴻迹去陽坡草茁燒痕消  
興來便欲行吟出十二街中徧寂寥

題畫

晴山隔岸繞江流沈綠浮青浸未收谷口烟蘿黃鳥樹  
水中莎草白鷗洲林空宜有幽居客川廣堪容待渡舟  
南去北來人擾擾不知何處可攀遊

題秦溪八景詩冊有懷朱文海

漁牧耕樵繞磻阿四時風景逐時多  
唱閑晚犢歌停調  
雲破春犁雪滿柯  
日落桐林海月上嵐收  
石屋晚鐘和  
秦溪舊境年年似物在人非奈爾何

王漢昭招飲步總管廟留題僧舍

不用湖山事遠遊  
海城東畔小瀛洲  
誰言閑市無閒地  
自覺浮生是蕩舟  
梁燕歲歸僧漸老  
庭花時發水還流  
一觴一詠青春暮  
爛醉何妨下榻留

丙辰二月雪庵上人邀飲小樓見杏花有作

何處招尋泛羽觴  
高樓花近淨年芳  
荒村暮雨曾沽酒  
梵境春風不出牆  
老我重思曲江院  
是誰今卧午橋莊  
相逢盡是凭闌者  
莫道偷閒過竹房

送平湖吳伯諧人尹入覲

河陽桃李頌清寧  
又唱離歌餞北行  
紅日九重京闕夢  
白雲千里故鄉情  
天顏有喜親顏近  
文選成功武選榮  
忠孝兩全名位盛  
壯遊真不負平生

正月二日朱孟瑜宅賞燈是日有雪



爆竹烘爐炭未灰  
朝元纔罷賞心催  
鰲峯瑞應三呼起  
火樹花兼六出開  
老去喜逢春宴蚤  
晦餘先借月明來  
臨安舊事依然在  
更待官燈上戲臺

秋暮有懷楊熙春

問程知是到長沙  
音信寥寥只自嗟  
孤枕客邊應有夢  
一身愁裡似無家  
經秋古樹留殘照  
臨水荒城見暮鴉  
幾度夜深寒不寐  
瀟瀟風雨上牕紗

西林

灤西佳致杜陵莊曲徑通幽入草堂日映松舉穿戶淡  
水流花塢過橋香條柔剪雨春蠶罷敗莠漂風晚稻長  
勝事不窮清賞足直須詩畫為傳芳

題碧泉卷

僊家池館絕囂埃一碧流泉近戶來為愛秋清淨如練  
卻嫌春蔓綠於苔迷津黑水應難濯入海黃河去不回  
何似蒼明長在目天光雲影鏡中開

和徐學士瓊送危昌言詩大樸之孫也

自是丹山五色雛至今文采與羣殊江湖浪迹惟琴劍  
丘壑閒情有畫圖吳苑清霜楓葉落楚鄉寒月鴈行孤  
相逢卻憶先公事惆悵才名老宦途

畫雲海圖送于文遠還新安文遠時與景瞻京兆  
通譜以子恕奉祠而歸

百年文武自高門散合無憑世系存徽國衣冠遺舊範  
吳山祠墓見雲孫星辰拱極元同象江漢朝宗會有源  
咫尺蓬萊人未見高丘遠海漫勞魂

遊春圖

柳陌桃溪處處和興闌歸晚夜如何壺觴已罄厭厭飲  
騎從行催踏踏歌滿路風聲啼鳥歇隔墻花影月明多  
朱門未扣人先應一點銀燈出綺羅

張士明西郊野趣

數椽茅屋住西郊野趣真成俗慮消臨水偶垂無餌釣  
登山時遇帶書樵半村禾黍連深巷五里輪蹄隔斷橋  
聞道春城遊賞歇夕陽林下獨逍遙

送蹇通判赴京

黃甲登名繡作衣官家中世似君稀提刑大振行臺憲  
佐郡全收侍殿威六月搏鵬聊一息三年停鳳又高飛  
懸知郭隗臺前路駿復天閑定不歸

送王主事伯舉抽分還部

數卷圖書上驛船飄飄文采似登仙司徒自古須經國  
進士從來最得賢越北關津無滯賈吳東山水有新篇  
懸知獻納丹墀裏五色雲中一鳳旋

題伍公矩桂林別意冊後

五嶺行雲七澤風東將入海汎鴻濛生還卻笑征南老  
往事空驚塞上翁萬里歸心孤磧鴈廿年春夢五更鐘  
曲江院裡看花伴物色于今盡不同

送王文昭秀才還慈谿

風雅文章世宦名西遊未久復東行廣場有羣駒難繫  
清野無蒿鹿未鳴燈下雨聲賓館夢江南晚色故園情  
溫柔舊學如君少落日臨期老眼明

松軒為無錫楊璠題

落日長松野蔓滋  
小門幽徑曲通籬  
影橫虛榻月當牖  
風度清琴聲滿帷  
冰雪歲寒人共古  
棟梁材大事何遲  
分明記得歌遊處  
白髮青林有夢思

鄉先達王公宗憲居官盛有時  
譽司銓衡者方欲倚重任而公乞歸  
甚力人益高之噫有果不易及也  
予不能暢其官美之名故連詩而為送之  
東將入海喜乘風回首紅塵香靄中  
浮世勞生何日盡

急流勇退幾人同  
杏花春雨江南路  
白髮青山洛下翁  
此別因君重興感  
不勝歸思附冥鴻

曾持使節過南徐  
監郡能聲衆所知  
推轂屢膺當道薦  
投簪竟為引年辭  
五湖烟水歸時樂  
千里棠陰去後思  
愧我素餐今白髮  
不堪碌碌尚驅馳





方洲集卷九

欽定四庫全書

集部  
方洲集卷十三  
十三

詳校官編修臣曹錫齡

中書臣劉源溥覆勘

總校官編修臣王燕緒

校對官編修臣嚴福

謄錄監生臣顧文新

欽定四庫全書

方洲集卷十

明 張寧 撰

五言絕句

出郊

路僻輪蹄少，溪深草樹齊。  
春風不解意，花落乳鳴啼。

閒居即事

雲淨山光澹，烟消樹影空。  
草玄閒坐久，落日見歸鴻。

詠馬

大宛歸來後天閑意氣雄  
太平多貢錫不數貳師功

雜興二首

池館臨丘壑泉聲落座隅  
林間逢隱者端坐說唐虞  
雲暝千峯暮林幽萬木寒  
故情殊未已誰肯念袁安

南浦停雲

不見同心人相思渺雲樹  
記得別離時卻在雲飛處

月牕詩興

涼影度牕紗枕簟涼如水獨坐發孤吟懷人幾千里

雨屋書聲

兀坐讀遺經青燈照寒雨風送隔牆聲併入芭蕉裡

獨意

天遠青山小林幽碧樹深清風與明月相對即知音

斑鳩百舌二鳥

晚蠶初出火大麥小登場何事林中鳥鉤輶喚雨忙

花重樹冥冥鳴春不避鶯如今成老大忘却舊時聲

鷹

自是飛颺器寧論擊搏功  
秋風起雙翮誰是渭川翁

紅梅

似杏色尚淺比桃香自濃  
能存舊時節莫問舊時容

白頭烏

本是青春烏生來便喚翁  
幾多頭白者懷抱尚童蒙

畫梧石題寄王君載

蕭蕭蘿薜風浙浙  
梧桐雨應有背岩人  
推篷坐無語

芙蓉

萋迷碧沚烟淺薄青蘋雨何事涉江人褰衣悄然去

晚步

江山如有家風月似無主緩步立斜陽微言共心語

題許明夫扇

流水石邊出遠山雲外青秋風落葉晚人在翠筠亭

雜詠十三首

行雲歸故山芳草蔽幽壑林下有閒人林花自開落

碧樹含秋色飛泉急晚聲不知誰領得惟有野人情  
蕭蕭蘆荻風淡淡江天月吟倚木蘭橈孤篷不堪發  
窮陰閔岩谷積雪滿山川只有江梅樹相看似去年  
斜日照江亭風高水滿汀潮來魚正上誰肯解漁罾  
楊柳綠堪染芙蓉紅欲然冥懷與誰契俯仰共熙然  
秋水際平蕪人家隔江浦何事晚歸來扁舟載烟雨  
地靜偏宜晚舟輕不怕潮身心兩無事隨處足逍遙  
風塵雙短鬢天地一孤舟老病三湘道誰憐杜甫秋



材大難為用心高不易招窮通各有為豈獨會稽樵  
雪滿人難出天寒酒不賒寒郊與瘦島今日在誰家  
夜氣散清空扶桑曙日紅普天皆仰照鳴鳳在梧桐  
夜靜水空清冷輪徹底明誰知潮長落長伴月虛盈

南川八景

春意入東疇田家農事蚤不聽飯牛歌誰知卧龍老  
積雪滿溪山朱門晝深閉一棹晚衝寒蕭然直鉤意  
草木忽妍麗愛此春光緩策入前村振衣一徜徉

蕭蕭短棹風汎入空明裏詩思滿江潭懷人忽千里  
赤壁已無人揚州在何處閒唱紫芝歌步入松陰去  
幽蘭發深谷采采不盈把援琴聊自娛何用知音者  
春到孤山未因梅見物情南枝與北榦各自有枯榮  
去此障烟枝養此凌雲節白晝引清風良宵逗華月

餘清雜興八首

夜冷衡陽月秋高震澤風相呼復相喚飛落荻蘆中  
遠樹烟中出孤峯鳥外青日斜山路迴人在最高亭

良夜永如年山亭坐起忽清風度脩篁虛室自生白  
明月印長溪涼風送虛榭孤榻冷如冰懷人坐長夜  
遠樹烟光夕柴門草色春山居無所見時有獨行人  
白鷺下寒塘隨風忽飛起惆望極青霄聯班隔千里  
大麥已登場梅天風雨後飽飯出柴桑披蓑種黃豆  
山遠惜擔重日斜愁路遙太平甘食力不是會稽樵

棄瓢圖

遜位峻相絕棄瓢焉足云獨憐堯舜日危行已如君

雜題六首

幽芳寄懸崖秋蒲出寒水相對不勝情蕭蕭半江雨  
泠泠渭曲風漠漠湘皋雨春雷昨夜鳴龍孫忽昂起  
風雨濕蓑衣求魚晚不歸此心先有待何必說忘機  
流水赴長壑山深莫窮源因之起遐想相對忽忘言  
樹密秋容淡江深暮景閒日斜人不見惟有釣舟還  
茂樹蔭虛牕晴烟蔽深壑林下獨經行藤花忽飄落

鶴鷄一首

秋黍白唐肥卑棲不解飛涼風吹短翼渾似卜商衣

林檎

紅潤過南橘香甘勝北梨晴牕見圖畫重和宋人詩

梅花鳥

嬌小青衣使籠葱蠟瓣花依然香韻在清賞屬誰家

枯株鵲鴝

凍雪滿林梢孤飛不敢高雖無儔侶顧還自惜翎毛

葡萄

卷十  
歲晏虬枝滿春歸蚓蔓伸行藏與時契不獨味宜人

晚坐有懷

白鶴暮歸來瑤琴未成曲梅花閒自開佳人在空谷

扁舟撒網圖

網小須頻撒舟輕宜慢搖水深行近岸魚上晚乘潮

題靈隱小畫二首

流水瀉危橋清風洒虛閣山下有行人山花對人落  
茅屋閉春蕪蘭舟汎烟草不是灞陵橋疑逢杜陵老

花鳥小畫

歲垂枝上花宛戀枝頭鳥花與鳥無情鳥自憐花好

西湖十詠為李載章題

蘇堤春曉

楊柳滿長堤花明路不迷畫船人未起側枕聽鶯啼

平湖秋月

風靜片雲消寒波浸涼月疑有夜吟人推篷落楓葉

花港觀魚

園園復洋洋  
芙蓉露藻香  
前湖張水戲  
誰解步濠梁

柳浪聞鶯

藜杖憇蘇灣  
風溫翠漲閒  
鶯聞雙語鳥  
如在畫船間

三潭印月

片月生滄海  
三潭處處明  
夜船歌舞處  
人在鏡中行

南屏曉鐘

幽夢忽驚覺  
巖城方向晨  
看花春起早  
已有曉妝人

兩峯出雲



南峯雲乍晴北峯雲欲雨中有化霖人高眠兩峯裡

雷峯夕照

爽朗忽蒼茫山高易夕陽百年歌舞地消得幾昏黃

曲院荷風

涼氣度芳洲香來水正流時聞採蓮曲不見採蓮舟

孤山梅雪

春意逼溪橋寒香閉蓬戶山人不出門驛使在途旅

為姚公綬題飛白竹

不是乘春綠終無變節黃惟應清白操歲晚映冰霜

張南山二景

冥冥天際風歷歷江心樹隔浦望漁村人家水中住  
不見舊朱陳山居長子孫時平春事蚤隨處好耕耘

沈啓南墨菊木蘭二首

粉素和鉛久松薰沁露濃幽香渾不改玄默傲秋風  
近水宛芬芳臨風淡容與不見採芳舟疑逢戍邊女

題許明夫扇

江山如有家風月似無主一醉淡忘歸夢落瀟湘渚  
一笑山小飛來峯雜詠

宿雨岩

峩峩蒼玉峯寂寂歸雲洞暮雨宿空岩蕭齋伴幽夢

尋松橋

懶看玄都桃停攀廣寒桂時過五雲橋尋松看詩句

丹丘

塵境有丹丘心閒地自幽世間黃白士莫向此中遊

沈履德瓶中海棠

彭老有許恨杜陵無句詩如何春後賞卻是折來枝

題梅為僧秋江

空林初月斜虛閣寒未曙相逢如有情含笑無一語

題畫

日落山水暮江空魚鳥閒停橈欲何待空載月明還

戴文進西湖景二首

宿雨住還滴朝雲爛不收陰晴猶未穩人在斷橋頭

春水鴨頭綠  
曉山螺髻青  
王孫舊遊處  
雲重樹冥冥  
倪克威壽萱圖

藹藹北堂花  
原是宜男草  
眷此白頭人  
忘憂不知老  
傅希兌翎毛四首

鷓鴣

習水巢登木  
繁胎子吐生  
似非凡鳥類  
可惜捕魚名

孔雀

惜尾矜還顧  
戀羣嬌不飛  
從來美好處  
須戒隱藏機

鴈

地險飛偏急江空落漸低如何雲漢羽卻傍芰荷栖

鷓鴣

贊列詞人筆名聞壯士冠全才不全貌莫作野鷄看

風雨墨竹二首為崔廷佩題

蕭蕭簷外聲拂拂牕上影美人期不來葉落瑤堦冷  
吳歌寂無聞楚舞嬌不舉林空白石晚一片瀟湘雨

漁樵圖

風靜烟濤息雲深石徑長江山一日話城市幾迴忙  
為葉希榮題竹

芳春初茁土首夏漸成陰不待冰霜後清風已滿林

三笑圖

意趣已相合行居何足言當時聊一笑今古作清論

春草四首

脉脉清明雨萋萋社日烟王孫歸不到目斷楚江邊  
要路峻還少閭門貧更多東君本無意點檢欲如何

生意忽滿地東風吹漸青隔江人不見烟重雨冥冥  
詩思淡未就客愁濃欲迷王孫舊遊路無處不萋萋

四鳥圖

野草寒堂裏雙棲雉子斑芙蓉間幽竹相映晚秋閒  
雪霽金頭瑩花明錦羽斑雕籠鎖鸚鵡不及傍雌閒  
葉茂花凝碧筠齊籜解斑不矜文采別桃竹共閒閒  
練尾飄纖素霜衣絕點斑風薰花不到一片白雲閒

沈石田折枝石榴



玉露溥珠簾金風折錦函鹽梅久已忘白首任清甘

題畫

琴弄皆成趣興居共樂閒地靈人老逸彷彿是香山

雙鴈

天遠秋無際江空夜不驚雙飛復雙宿風雨莫孤征

墨竹

蕭蕭落日風浙浙清秋雨滿目歲寒情相看不能語

黃紫菊花圖

春色多紅紫秋香尚白黃良工亦何意隨手作低昂

真寂八景

西丘庵

松柏繞蓬堵烟雲淨草廬何由脫塵鞅借榻讀吾書

北磻祠

古人已長往今人懷未忘悠悠祠屋裡不斷舊爐香

劃竹軒

蔬食良自適肥甘豈足任惟應軒外月照見故交心

覆船山

不是虛舟覆猶疑夜壑翻天工垂永戒平地有波瀾

心遠樓

塵境已如許山林應更幽此情何處見天外一層樓

松隱堂

地僻秋常蚤牕明月已高無人訪幽寂惟有鶴來巢

曲磻橋

水曲沿塘轉橋危藉石支杖藜扶晚過忽憶祓除時

半池月

清明如判壁迴抱似弦弓不是僧房近歌遊即泮宮  
白頭公手卷為沈材美題

堂上白頭親花間白頭烏故色故人情雙成與春老  
蘭竹圖為朱武題

悠悠王者香猗猗君子節上下歲寒期清湘映明月  
表表青琅玕倒蘸懸崖水彷彿鳳鳴陽靈風吹欲起

期張天常不至

歲盡東風轉衡門日晏開不知因底事不見故人來  
雪牕蘭為雪江題

清琴久無聲芳珮邈已解疎影落斜陽蕭蕭復誰采  
沈啓南萱草

楚楚清芬老別來猶爾芳不須多種植對此已憂忘  
梅花為湛秋江題

山靜夜如年牕虛獨未眠一枝斜更好月到曲闌邊  
留犢圖

人道時苗事懷廉不近情猶勝尸素去行李屬歸程

葡萄

聞道乘槎客相攜到漢庭何緣嘗草日先自入醫經

小景

風漾釣絲輕蘭舟不礙行一聲長笛晚江靜月孤明

沈石田山水為于景瞻題

溪山間無人凝泊如有待滿眼古清秋舟輕不堪載

向汝隆畫鷄冠花扇圖

十年歸舊隱不聽蚤朝啼  
卻向蓬蒿裡昂藏對竹栖  
林良花鳥二首

竹樹晚淒淒天寒相傍栖  
春風疎雨歇飛上畫樓啼  
宿食共相投枯荷野渚秋  
平生急難意何用急時求

向汝隆雲山圖

烟樹雙溪曉雲霞萬壑春  
不知林徑裡誰是草玄人  
題竹石圖送宣天然

白石一拳小脩篁數葉多  
萬山冰雪裡試看此如何

題幽鳥

上苑花如錦雕籠翡翠新  
脩篁玉隣野樹啼鳥一般春

七言絕句

宋太子墨竹二絕

御墨龍香出內庭  
幾枝疎影拂前星  
當時粉繪多零落  
惟有寒梢似舊青

想見青宮拂素絲  
清風雅操玉參差  
一般翰墨歸人世  
還有章懷太子詩



寄故知二首

潮落平沙小棹移  
雨晴烟柳遠含滋  
非熊好夢知何日  
回首滄洲動遠思

秦溪山色遠林扉  
積雨初晴野樹微  
故舊相逢元有約  
海鷗何事復驚飛

九日寄劉世亨侍御

去年重九共追遊  
今日西風兩地秋  
遙想登高南望遠  
茱萸滿眼不勝愁

詠梅二首寄沈孟淵

斷腸詩思滿江南別後姿容總一般  
料得林逋慣相惜肯教寂寞過春寒

孤根春暖雪初消香滿西湖第六橋  
最是懷人牕下意怕看明月上寒梢

和魏侍御雨中見寄五首

秋來日日望天晴曉雨初收晚又陰  
鄉思較來千倍苦滿庭衰草候蟲吟

容懷牢落向秋深  
詩酒渾無往日心  
何處寒砧且停手  
近來情緒已難禁

雲開乍覺雨聲乾  
落日登臨望眼寬  
白髮雙親應念我  
悔將書劍入長安

落落惟應鮑叔知  
逢時仍抱失時悲  
長楊宮殿新成賦  
欲獻猶疑是古詞

雙鬢逢秋病轉多  
野田風雨欲成河  
鶻巢不是當年好  
天上佳期近若何

彥敬山水

萬壑千峯一道通  
震雷聲裡掣飛龍  
詩人莫賦三千丈  
五老峯高未易窮

飛鳴宿食四鴈

孤雲寒影共悠揚  
塞北江南萬里長  
最是日斜疎雨歇  
半拖秋色到衡陽

白羽橫空落未休  
一聲風露九江秋  
不知誰是愁中客  
夢斷天涯十二樓

旅食天涯不計年  
離離禾黍滿秋田  
江湖野味多如許  
露飲風餐只自便

黃蘆苦竹晚萋萋  
風靜寒塘自在棲  
邊塞有書歸未得  
夜深無夢到遼西

題畫四首

朔風吹雪滿天涯  
景物依依逼歲華  
見說孤山春意蚤  
欲將清興賦梅花

沙磧春深首宿肥  
錦鞍新卸遠行歸  
胡兒不敢窺邊郡

手挽弓梢看鴈飛

不用青衣馬上扶蒼松白石即吾廬  
太平時節家家醉  
不是高陽舊酒徒

小隊喧呼禁路聲  
百花隨馬玉山橫  
醉中尚憶青樓約  
分付前叮緩轡行

園梅盛開二首

暖透孤根雪乍消  
冰花萬點綴寒條  
尋幽欲寄山中客  
忘卻西湖有斷橋

記得羅浮入夢時  
遺芳不減舊丰姿  
今朝童子推牕看  
報道西風雪滿枝

王修撰雉鴝圖

不用高飛逐走蓬  
鳴鳩乳燕自相從  
日斜庭院春聲歇  
一樹櫻桃細雨中

題餘不春社詩二首

五風十雨荷皇天  
桑滿墻陰稻滿田  
記取年年寒食節  
大家先辦賽神錢

白叟黃童半醉醒酒闌連袂踏歌行百年盛事先珍重  
為寫新詩托姓名

畫犬

金鈴不動夜沈沈足下生麈毳亦深庭院風閒簾幌靜  
戲隨蝴蝶吠花陰

林溪六景

東林夜月

風靜猿啼月滿山東林夜色共人門柴門正與清光對



分付山童且莫闌

前村牧笛

草綠平原春雨歇  
花殘曲徑夕陽明  
朝來暮去年年似  
吹散榮華是此聲

後浦漁歌

欸乃新聲度遠汀  
烟消日出樹冥冥  
年來悟得滄浪意  
長近西堂竹下聽

蓉溪秋水

溪頭寒水沒滄洲  
溪上芙蓉一色秋  
遠道西風人不見  
採芳空倚木蘭舟

花村酒旆

寥寥一犬吠柴扉  
花颺東風淡落暉  
行客不須重借問  
尋春時有醉人歸

溪橋殘雪

日暖風寒野色昏  
危梁半露水添痕  
行吟索共梅花語  
春在寒梢剩幾分

仙女圖二首

碧空雲淨石壇清  
自啓琅函拜月明  
一道靈風王母降  
山童莫認許飛瓊

藥珠經罷玉香消  
白鶴來時樹影搖  
環珮一聲人不見  
滿天風露月中霄

羅浮夢

月落參橫夜五更  
荒園睡覺不勝情  
鉛華滿世皆春夢  
贏得羅浮野夢清

仙女圖

謝却紅塵學道妝黃庭一卷日初長  
小真未解清虛意  
時折閨花供石牀

題畫三首

瀑布穿雲出礪碨行人指點似天台  
瓊樓玉宇迷前路  
惟有桃花逐水來

松檜陰沈積雨餘涼飈薦爽入郊墟  
小牕孤榻青燈夜  
疑是昌黎訓阿符

昏靄昏黃夜泊船  
鷓鴣聲裡雨如烟  
秋風不見平安信  
夢斷湘江又十年

贈沈希貴老友

孤舟烟月老寒江  
滿眼瓶罌見玉缸  
同上歌樓不同醉  
共誰調笑卧蓬牕

竹鶴老人畫

水烟山靄樹冥冥  
船在丹青畫裏行  
如是苕溪二三月  
南邊雨落北邊晴

寄鄭提舉世昌

少小交歡已白頭十年心事變新愁  
粵王臺下春光滿  
人在滄江獨倚樓

方洲即事二首

一番風雨過方洲  
淡綠新篁漸入秋  
歌盡竹枝人不解  
隔江誰唱越溪謳

閒來徐步方洲上  
但覺詩懷處處生  
竹影不隨流水去  
夕陽斜照樹梢明

問月圖

小山孤坐月來時舉酒長歌問月詩采石江頭自圖缺  
更無一語應前詞

秋聲圖

燈孤月冷草堂深蕭颯聲中葉亂吟一自歐陽賦成後  
楚天風露盡闌心

飛泉出壑圖

一從神斧闢龍門萬里翻瀾日夜奔浪說黃河自天上

不知何處是真源

秋石

鷄犬無聲夜有光  
金波亭沸玉脂香  
丹溪自有輪迴說  
不是龍君海上方

題沈定菴夢梅吟詩卷

手把花枝入睡鄉  
滿城桃李夜茫茫  
香消墨淡人如玉  
好夢相傳字幾行

畫梧竹寄談大章



磷磷白石照滄洲玉瘦金寒碧水流  
記得鴛鴦湖上景  
對君疑是舊時秋

畫小景題寄郭益涓

樹頭風急澹烟暉石竹蕭蕭澗草稀  
清賞不來時又晚  
滿林黃葉趁鴉飛

畫景寄胡景容

獨樹邊崖葉盡枯蘿烟竹露共蕭疎  
杜陵老病扁舟去  
一夜月明湘水孤

題畫

赤壁磯頭暮景開  
寒潮落盡石崔嵬  
秋風八月形如象  
錯認瞿塘濫灑堆

雜詩二首

漠漠江天淡淡秋  
一聲長笑下中流  
青蘋風急絲綸晚  
人在蘆花缺岸頭

綠柳含薰白苧涼  
畫船風細藕花香  
閒來一枕遊仙夢  
睡起蓬牕又夕陽

夏仲昭竹

冥冥烟雨日沈西  
水漫湘皋路欲迷  
羅袖茜裙人不見  
黃陵廟裡鷓鴣啼

為盛用章郎中題紅梅墨竹

羅浮山下野橋邊  
冰雪姿容異往年  
醉後不須銀燭照  
暗香疎影故依然

玉簫聲斷綵雲移  
翠翟飄風欲下遲  
記得掖垣東畔立  
碧梧紅日看來儀

林良花鳥二首

香風披拂羽毛新  
老翠妍紅早晚春  
影入紗厨描不就  
一聲嬌語動閨人

一度東風一度歸  
朱門多在昔人非  
舊巢零落春泥濕  
銜傍綠楊低處飛

山行訪隱即事

山深樹密門常閉  
野客敲門山犬吠  
童子窺人隔短墻  
庭花飛出墻頭樹

畫圖送韓成章還揚州

出岫無心未倦還  
春來雲鳥共人間  
滿懷幽意誰堪語  
背立東風看故山

寄張天所

杜陵莊南雲氣昏  
尚胥橋北水連村  
春來日日多風雨  
一棹浮香直到門

溪山夜泊一首

風靜江波月淨烟  
不禁清淡夜如年  
無人為說清秋意

疑有隔溪漁未眠

郊行感興

驛騎飛行野棹遲  
忙閒應與事相宜  
平生此意中藏久  
勞逸無憑只自思

蠟背

山鳥元因口得名  
柔調未及畫眉聲  
寒梅苦竹荒林下  
却此籠中語更清

鴈

水碧沙明夜不驚黃蘆風急苦寒生  
中郎書札今安在  
仰首青霄喚侶鳴

鶴

一自傳書海上歸  
洞天清冷不勝衣  
近來已少葫蘆血  
莫載纏腰俗士飛

題方同知馬圖

日移仙仗出蓬萊  
錦障初收玉轡迴  
衆裡忽驚雙辟易  
一聲毬杖自天來

玉河水淺沒霜蹄可是長楊射獵歸一種天閑芻牧共  
為誰清瘦為誰肥

雪垂風撼浪騰空沙襯連錢八字紅勢欲仰天雲不下  
一番乾霧滾猶龍

楊柳風高隔樹嘶滿身流赭解鞍遲如何斗水能消渴  
不及長城飲窟時

題野梔山牡丹二絕

水邊林下見幽芳碧草萋萋映淺妝二十四番風信裏



一般清苦為春忙

繡幃金障渺天涯  
小苑東風半著花  
十載舊遊人不見  
也隨春意報年華

廳事前一木屏  
墁圻潔白可愛  
因作松石圖戲為  
絕句

雲根露節映山青  
十載春風紫禁庭  
却笑歲寒心事在  
又隨詩筆落臨汀

白頭公

生來便喚白頭公名物相依偶此同滿地東風自春色  
非關臨老入花叢

蠟背

花柳東風淑氣新巧音流麗弄芳春禽中蠟背猶堪聽  
世上應多蜜口人

倦繡圖為伍司訓

描得孤鴛繡未成玉纖扶頰睡魔生秋波半斂還驚覺  
怪底風敲畫軸聲

畫秋意送崔揮使

水湧雲峯碧四圍  
天連江色鴈初飛  
秋風不見汾河掉  
人在霜林倚夕暉

村居

暖風吹綠山前草  
膏雨染紅溪上花  
滿地芳菲春正好  
古林幽屋是誰家

題畫

金玉湖光錦繡紋  
草香風暖鹿成群  
洞門深去知何處

聽得鸞笙入綵雲

卷十

山遊偶興二絕

桃花小雨柳條風  
山近高樓窄徑通  
一局殘棋日當午  
更催童子取焦桐

輕烟縹緲雨霏霏  
芳草連崖入翠微  
黃鶴不來松自老  
野藤花下鷓鴣飛

戴文進芭蕉士女

靈壁峯邊未著霜  
輕分蕉綠試龍香  
不知寂寞幽闌思

寫到闌睂第幾章

賜來紈扇過秋閒  
閒摘芭蕉喚小鬟  
拈筆欲題心尚懶  
怕隨流水落人間

離披殘綠不堪題  
題就還防侍女疑  
滿地落紅無一字  
怪他秋後學春姿

蕉花新吐絳苞香  
却與宜男隔畫牆  
摘葉題詩記時月  
看渠何日獻蕉黃

秋江烟艇

山水風烟共一舟清羸詩病不禁秋殘陽欲盡寒潮落  
欲採江蘺寄遠遊

為于景瞻畫高山流水圖

山懸星漢水迴瀾林谷無人碧樹寒千古知音共相許  
當時聲調若為彈

鍾巨川赴任為題看月圖

小山孤月淨流輝石磴高寒酒力微清賞正濃賦未穩  
夜深松露濕秋衣

雜詠

老木槎牙淺淡春陰苔滿地淨浮塵東花吹斷烟花夢  
笑傲山林有幾人

蕉扇停揮白苧涼  
操琴未鼓竟先忘  
綠楊風靜山如畫  
人在清都白玉堂

美人圖

銀燭熒熒夜五更  
薔薇露重小寒生  
玉纖未度冰絃斷  
斜抱箜篌坐到明

十二闌干曲曲行一般調笑各含情不知今夜樓頭月  
却傍誰家分外明

題畫鷹為張僉憲

萬里烟霄振羽儀下來芳樹立多時秋深孤兔無行迹  
側目崖陰有所思

天漢清明草澤荒半將軒舉半潛藏麟鳳亦是飛行物  
莫見翎毛槩擊揚

和韓成章懷歸四首



庭前甘菊正芬芳  
晚色催人上鬢黃  
莫怪尋常開口笑  
清安不似浣花妝

雲深茅屋幾層闕  
露篠烟蕪水石間  
看慣遊魚渾不避  
忘機遠過白鷗閒

竹邊流水日潺湲  
竹外閒雲伴鶴還  
白鶴自飛雲自散  
夕陽人在水聲間

漠漠晴川淡淡風  
松舟桂楫路相通  
蓮歌未斷漁歌起  
妝點風光似越中

閒居漫興二首

灤西茆屋曲江濱  
幾度東風亂後春  
黃四娘家樓上景  
故應花惱白頭人

此中深意許誰知  
三徑秋香正滿籬  
總是白衣無酒至  
忘言長似醉來時

方洲集卷十